

La ps vul dapli egualitad tranter dunna ed um

La regenza prenda posiziun sin in'incumbensa da la fracziun socialdemocratica

■ (mc) La fracziun socialdemocratica dal cussegl grond pretenda cun sia incumbensa da promover a moda curaschusa l'egualitad tranter dunna ed um en il Grischun. Per la ps èsi urgent ch'il chantun Grischun fetschia progress substanzials en quest regard. En l'introducziun da l'incumbensa cistescha la premsignanta *Sandra Locher Benguerel* (Cuir) l'artitgel 75 da la

Constituziun chantunala che sa cloma tranter auter verbalmain: «Il chantun e las vischnancas promovon il bainstar e la segirezza sociala da la populaziun, da la famiglia e da las singulas persunas.

Els s'engaschan per l'egualitad da las schanzas per tuts, spezialmain per l'egualitad da dunna ed um.» Locher conceda ch'il Grischun è areguard l'egualitad da dunna ed um sin buna via.

Svilups positivs dettia cunzunt en la furmaziun. Dunnas sajan ozendi scoladas uschè bain sco umens. Era per positiva taxescha Locher l'amplificaziun da la tgira d'uffants complementara a la famiglia che contribueschia ad ina tscherita autonomia economica da famiglias (mamas) e ch'agumentia la quota d'activitad da gudogn da las dunnas. Da l'autra vart dettia dentant era secturs

cun in svilup plitost pitschen quai che concerna l'egualitad.

Deficits en plirs secturs

Per remediari quests deficits duai vegnir persequità in entir catalog cun las suandantas finamiras: Augmentar la participaziun politica da las dunas sin tut ils stgalims; augmentar ferm la quota da dunnas en posiziuns directivas en la politica, en l'administraziun ed en l'economia; abolir las inegualitads da pajas; meglierar la cumpatibilitad da professiun e famiglia tant per babs sco per mamas; reparter meglier l'activitad da gudogn pajada e la lavur da chasa sco er la lavur voluntara/lavur da tgira betg pajada; prender mesiras per cumbatter la povradad en la vegliadetgna; evitar rollas fermamain dominantas, socialmain marcantas e stereotipicas; abolir la gronda mancanza da statisticas specificas per la schlattaina; proteger encunter violenza a chasa sco er cunter mulestas sexualas.

Ils socialdemocrats vulan perquai incumbensar la regenza d'evaluar ina strategia sco er in plan d'acziun «egualitad tranter dunna ed um» principalmain per l'administraziun chantunala che duai sco gronda patruna esser in exempel per las interpresas privatas. En quels plans d'acziun duain vegnir definidas finamiras e mesiras correspundentas che duain vegnir integradas en il program da la regenza. Per quest intent duai il chantun metter a disposiziun las resursas finanzialas e persunalas necessarias.

La regenza pren posiziun

La regenza sincerescha ch'ella s'engaschia gia dapi onns per l'egualitad da las

schanzas tranter dunna ed um, per l'egualitad da las schlattainas e per il cumbat cunter la discriminaziun pervia da la schlattaina. Ella haja gia cuntanschì blier ils ultims onns, cunzunt sin il sector da furmaziun. Plinavant haja il chantun promovì il project dal parlament grischun da mattas, augmentà il dumber da dunnas en las cumissiuns chantunales ed en il program d'acziun per interpresas pitschnas e mesaunas. Per promover structuradas favuraivlas per famiglias ha il post per egualitad lavurà ensemen cun 26 interpresas cun radund 2100 collavuratur. Plinavant haja il chantun prendì mesiras per cumbatter violenzas da chasa e per garantir salaris equivalentes en il sector public. En vista a la revisiun da la lescha da persunal vegnian prendidas en mira ulteriuras meglieraziuns.

La regenza punctuescha che la promozion da l'egualitad en tut ils secturs da la vita saja in'incumbensa interdisciplinara che possia avair success mo sch'ella vegnia prendida a maun sin moda cumplessiva. La regenza è perquai pronta d'elavurar in plan d'acziun per l'egualitad en l'administraziun chantunala e da metter a disposiziun per quest intent las resursas respectivias. La regenza preveda d'agir en quatter fasas: Primo inventarisar la situaziun, secundo installar ina gruppa da lavur interdepartamentala, terzo realisar las mesiras e quarto far il controlling ed in rapport final. Suentar avair emplimentà ed evaluà il plan d'acziun per l'administraziun chantunala duai vegnir decidì davart in'eventuala segunda etappa che va sur l'administraziun chantunala or.



Cun pitschnas resalvas è la regenza pronta d'acceptar l'incumbensa da la ps e d'elavurar in plan d'acziun per l'administraziun chantunala.

MAD